

Alþingi
Erindi nr. P 132/1868
komudagur 24.4.2006

Reykjavík 24. apríl 2006

Sigurður Kári Kristjánsson
formaður menntamálanefndar

Þökkum bréf þitt frá föstudagskvöldi og fögnum fundi á þriðjudag þar sem frumvarpið um Ríkisútvarpið hf. verði rætt. Sjá að neðan óskir okkar um dagskrá þess fundar.

Í framhaldi af spurningu þinni um þau efnisatriði frumvarpsins sem nauðsynlegt er að ræða sérstaklega í nefndinni setjum við, að höfðu samráði við forystumenn flokka okkar, fram eftirfarandi boð um verklag sem leitt gæti til samstöðu milli stjórnmálaflokkanna og sátta í samfélaginu um framtíð Ríkisútvarpsins:

1. Frumvarpið verði ekki afgreitt á þessu þingi en strax að því loknu sett niður nefnd með fulltrúum allra flokka með það að markmiði að ljúka lagasetningu fyrir áramót.
2. Í störfum sínum kanni nefndin sérstaklega að Ríkisútvarpið verði gert að sjálfseignarstofnun í atvinnurekstri. Í frumvarpinu verði þess gætt að halda sem allra flestum kostum hlutafélagsformsins fyrir Ríkisútvarpið sem almannaútlarp en sniðnir af helstu ókostir þess.
3. Nefndin ræði einnig margvíslegar ábendingar um úrbætur á fyrirliggjandi frumvarpi, þar á meðal
 - a) um 3. gr. frv., um hlutverk og skyldur – rætt verði hvort þessi skilgreining er ekki of víð í heild, og hvort hún nær nógu langt sem leiðbeining um dagskrá almannaútvarps, m.a. í ljósi Evrópuréttar og tilmæla Evrópuráðsins.
 - b) um stjórnarhætti skv. III kafla frv. – þar sem m.a. verði rætt um fyrirkomulag með stjórn annarsvegar og eftirlitsráðs (t.d. „akademíu“) hinsvegar, um fyrirkomulag þar sem ekki myndast sjálfkrafa ríkisstjórnarmeirihluti í stjórn, um stöðu útvarpsstjóra gagnvart stjórn o.fl.
 - c) um „almenna starfsemi“ skv. 4. gr. frv. – þar sem slík starfsemi sé skilgreind betur og meðal annars gert ljóst hvort heimild til hennar taki til útsendingar útvarps- eða sjónvarpsdagskrár í hagnaðarskyni eingöngu, sjálfstætt eða í samvinnu við aðra,
 - d) um réttindi starfsmanna, bæði þau sem að lögum fara og þau sem um skal samið,
 - e) um stöðu safnefnis RÚV, sem skv. brtill. meirihlutans nú á að færa yfir í samkeppnisrekstrarhluta fyrirtækisins,
 - f) um fjármögnunarleiðir skv. IV kafla frv. – þar sem rætt verði í alvöru um fleiri fjármögnunarleiðir en nefskatt, þar á meðal hvort hugmyndir um tengsl við persónuafslátt eru raunhæfar, og um það hvort heppilegt er að takmarka tekjur af auglýsingum og kostun með einhverjum hætti,
 - g) um eiginfjárstöðu hins nýja fyrirtækis og æskilega upphæð stofnfjár,

og h) um heimild til að selja eignir úr fyrirtækinu, sbr. 1. gr.,

Við leggjum til að á fundum menntamálanefndar um Ríkisútvarpið á næstunni verði starfið í sumar undirbúið með þessari dagskrá að minnsta kosti:

- 1) Leitað verði umsagnar fjölmiðlaskrifstofu Evrópuráðsins um frumvarpið.
- 2) Fulltrúar Ríkisendurskoðunar og Samkeppniseftirlits verði kallaðir fyrir nefndina í ljósi bréfaskipta við ESA, Eftirlitsstofnun Efta (sbr. einkum bréf ESA frá 20. janúar).
- 3) Fulltrúi menntamálaráðherra leggi fram þann „samanburð á sjálfseignarstofnun og hlutafélagi“ sem minnst er á í greinargerð með frv. (liður 3 í almennum athugasemdum). Óskað verði eftir fulltrúum sjálfseignarstofnana í atvinnurekstri á fund nefndarinnar, t.d. Verslunarskólans og Viðskiptaháskólans á Bifröst.
- 4) Fulltrúum frá BSRB og BHM verði boðið á fund nefndarinnar í ljósi óánægju á RÚV með réttindamál. Til fundar verði boðaður fulltrúi frá Lífeyrissjóði starfsmanna ríkisins (t.d. Haukur Hafsteinsson) til að skýra ákveðin atriði (m.a. biðlaun , 65 ára reglu) réttindamálanna.
- 5) Samanburður verði gerður á starfskjörum starfsmanna RÚV nú og starfskjörum skv. frumvarpinu – sérstaklega hvort breytingar á lífeyrissrétti og biðlaunarétti í frumvarpi feli í sér skerðingu á stjórnarskrárvörðum eignarrétti,
- 6) Fulltrúar fjármálaráðherra og menntamálaráðherra geri grein fyrir væntanlega eiginfjárstöðu fyrirtækisins eftir lög um breytingu á rekstrarformi þess.
- 7) Eignaskrá fyrirtækisins verði lögð fram, og sérstaklega greint frá helstu menningarlegu verðmætum í eigu eða vörslu Ríkisútvarpsins.
- 8) Farið verði yfir réttarstöðu dagskrárefnis sem RÚV á í félagi við aðra og þá samninga, svo sem höfundarréttarsamninga, sem RÚV hefur gert um dagskrárefni. Sérstaklega verði kannað hvort Ríkisútvarpið hefur heimild til að framselja efni sem bundið er höfundarrétti til sjálfstæðs lögaðila, hlutafélags í samkeppnisrekstri. Fulltrúi RÚV með sérþekkingu á safnefninu verði kallaður til fundar, og einnig fulltrúar rétthafa, t.d. lögmennirnir Knútur Bruun og Ragnar Aðalsteinsson.

*Mörður Arnason
Atli Gíslason
Björgvin G. Sigurðsson
Einar Már Sigurðarson*

fulltrúar Samfylkingarinnar og Vinstri hreyfingarinnar – græns framboðs í menntamálanefnd alþingis

Afrit sent fjölmiðlum